



ԹԵՄԱԿԱՆ ԿՅԱՆՔ

ՎԻՐԱՀԱՅՈՑ ԹԵՄՈՒՄ

1993 թվականի հուլիսի 5-ին Թբիլիսիի «Մետեխի» հյուրանոցում տեղի ունեցավ հարցազրույց կրոնի ուսուցման և վերածննդի վրացական միջազգային ֆոնդի ներկայացմամբ:

Ներածական խոսքով հանդես եկավ պարոն Նուգար Բարդավելիձեն՝ հավաքվածներին տեղեկացնելով ֆոնդի նպատակներին: «Նախ և առաջ,—ասաց նա,—սա մարդու իրավունքների և ազատության պաշտպանության, Վրաստանի տարածքում ապրող այլ ժողովուրդների, ինչպես նաև այլ պետությունների կրոնների վերաբերյալ տեղեկությունների փոխանակության համար է, Վրաստանի տարածքից դուրս գտնվող վրացական հուշարձանների ուսուցման, Վրաստանից դուրս ապրող վրացիների հետ կապի պահպանման, իր նշանակությամբ եզակի կրոնների պատմության թանգարանների ստեղծման համար է»:

Այնուհետև խոսք առավ պարոն Պաստա Չեպուրիշվիլին՝ Ֆոնդի նախագահը: Իր ընդարձակ ելույթում նա հաղորդեց, որ չնայած Ֆոնդի նորաստեղծությանը, այն արդեն ունի ընդարձակ գրադարան և ֆիլմադարան: Ստեղծված է տեղեկատվական-վերլուծական կենտրոն, որն ուսումնասիրում է կրոնական իրավիճակը Վրաստանի շրջաններում: Կենտրոնի աշխատանքներին մասնակցում են բարձրորակ իրավաբաններ, տնտեսագետներ, ազգագրագետներ: Ֆոնդի նախագահն ընդգծեց, որ դա ոչ թե տնտեսական, այլ ավելի շուտ քաղաքական կազմակերպություն է, որը ժամանակի ընթացքում կվերածվի պետական մարմնի՝ արտասահմանյան նույնատիպ նախարարությունների նմանությամբ: Փաստորեն Ֆոնդը նախատեսում է տարբեր կրոնական դավանանքների պաշտպանվածություն, յուրաքանչյուր քաղաքացու խղճի ազատություն, ինչպես նաև հասարակական կարծիքի ձևավորում, տարբեր կրոնների ներդաշնակ գոյատևման պայմանների ստեղծման նպատակ: Այդ ամենը պետք է կանխի միջդավանական պառակտումները և լուծի ներդավանական խնդիրները: Նշվեց նաև, որ Վրաստանի միավորումը չի կարող ընթանալ «Կեցցե քրիստոնեական դեմոկրատական Վրաստանը» նշանաբանով, որովհետև վրացիների մեծ մասը ինչպես Վրաստանի տարածքում, այնպես էլ նրա տարածքից դուրս դավանում է Իսլամը: Բոլոր մահմեդական վրացիների միավորման նպատակով պետք է Թբիլիսիում բացվի իսլամական կենտրոն և դպրոց, որտեղ կպատրաստվեն հոգևոր անձինք, որոնց համար Վրաստանի խնդիրները կդառնան առաջնահերթ:

Անհրաժեշտ է վերականգնել և պահպանել հնագույն սրբությունները՝ անկախ նրանց ծագումից: Մոտ ժամանակներս կվերականգնվի Վրաստանի Կաթոլիկ Եկեղեցու եպիսկոպոսական Աթոռը, և Ֆոնդը դրա համար քիչ ճիգեր չի գործադրում: Մեծ գոհունակությամբ նախագահը նշեց, որ Վրաստանի հայոց թեմի առաջնորդի ճիգերի շնորհիվ և Աստուծո ողորմածությամբ բոլորովին չեն վատացել հարաբերությունները հայկական և վրացական դավանանքների միջև: Նույնը կարելի է ասել նաև մահմեդական, հրեական համայնքների հետ վրացական դավանանքի փոխհարաբերության մասին: Տարբեր դավանանքների միջև ծագող խնդիրների ճիշտ ժամանակին բացահայտումը և ուսումնասիրումը հնարավորություն կտա խուսափել տհաճ միջադեպերից:

Ֆոնդի աշխատանքային պլանը վերանայվել է Նորին Սրբություն Համայն Վրաստանի Պատրիարք-Կաթողիկոս Իլիա Բ-ի կողմից, ինչպես նաև ներկայացվել Վրաստանի կառավարությանը:

Հարցազրույցին ներկա էին Վրաստանի Պատրիարքարանի, Կաթոլիկ Եկեղեցու, Թբիլիսիի հրեական համայնքի, Վրաստանի մահմեդական սուլիների և շիաների ներկայացուցիչները:

Հայ Եկեղեցու կողմից Նորին Սուրբ Օծություն Տ. Տ. Վազգեն Ա Ամենայն Հայոց Կաթողիկոսին և Վիրահայոց թեմն էր ներկայացնում տեղի հոգևոր առաջնորդ գերաշնորհ Տ. Գևորգ եպիսկոպոս Սերայդարյանը: Նրան ողեկցում էին Տ. Հովհաննես ավագ քահանա Դանիելյանը և թեմական խորհրդի քարտուղար Վիլի Գրիգորյանը:

